



Jens Napātôk, Partii Naleraq
/ maani

Inorliunerusuni inissialortiternerit pillugit § 37 naapertorlugu apeqquteqaammut 2020-114-imut akissut

24-07-2020

Suliaq nr.: 2020 - 11632

ID nr. 54956057

Asasara Jens

Inatsisartut suleriaasianni § 37 naapertorlugu isorliunerusunik inissialortiternerq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

Fax: (+299) 34 63 56

www.naalakkersuisut.gl

1. Nunaqarfinni illoqarfinnilu isorliunerusuniittuni sanaqataalluni illuliornissanut Kommuninut tapiissutaasartut Kommuniniit tamakkiisumik atorneqartannginnerat soorlu avannaata kommuniani Naalakkersuisut qanoq iliuuseqarfiginiarpaat?

Akissut: Akissuteqaammut ilassutissamik Aningaasaqarnermut Naalakkersuisoqarfik pissarsiniarfigineqarpoq, tassanngaanniillu ilisimatitsissutigineqarpoq:

Naalakkersuisoqarfik ilisimatitsivoq, Aaqqissuusseqqinnermut Ataatsimiititaliap isumaliutissiissutaata, aammalu Inatsisartut taamatullu Naalakkersuisut kissaateqarnerisa kingunerisaannik ukiuni arlalinni aningaasanut inatsisini aningaasaliissutinut arlalinnut, ilaatigut sanaartornermut tunngasunut akisussaaftit Inatsisartuniit kommuninut siaruarterneqarnissaat pimoorullugu sulissutigineqartoq.

Tamanna ukiumoortumik ataatsimoorussamik tapiissutissat pillugit kommuninut isumaqatigiissuteqartarnernut atatillugu ingerlanneqarpoq, tamannalu aamma aningaasanut inatsimmi konto pingaarneq 20.05.20 Kommuninut ataatsimoorussamik tapiissutit aqqutigalugu ukiut ingerlanerini aningaasaliissutaasartut amerlingaatsiarnerinik kinguneqarpoq.

Tassunga assersuutit arlallit saqqummiunneqarsinnaapput:

- 2017-imut aningaasanut inatsimmi konto pingaarneq 87.72.22 Nunaqarfinni isorliunerusunilu inissialortiternerimut pilersaarut, taamani atuuttuusimasoq aqqutigalugu aningaasaliissutit kommuninut nuunneqarput.
- 2018-imut aningaasanut inatsimmi konto pingaarneq 89.72.11 Namminerisamik tapersiissutitalimmik inissialortiternerq, taamani atuuttuusimasoq aqqutigalugu aningaasaliissutit kommuninut nuunneqarput.
- 2020-mut aningaasanut inatsimmi konto pingaarneq 87.72.23 Inissialortiternerimut tapersiissutit, iluarsaassinissamut tapiissutit, taamani atuuttuusimasoq aqqutigalugu aningaasaliissutit kommuninut nuunneqarput.

2017-imi Namminersorlutik Oqartussat aamma kommunit akornanni ataatsimoorussamik tapiissutit pillugit isumaqatigiisummi imatut allassimasoqarpoq: " Nunaqarfinni isorliunerusunilu inissialiormut pilersaarummik nuussineq ":

" AIS2017-imi konto pingaarnermut 87.72.22 Nunaqarfinni isorliunerusunilu inissialiormut pilersaarut, 2017-imi 25,3 mio. kr.-inik kiisalu 2018-imit 26,5 mio. kr., aningaasaliissutinik illuartitsisoqarpoq siunertamut tunngatinneqartunik.

Susassaqartut isumaqatigiipput, 1. januar 2017 aallarnerfigalugu aningaasaliissutit kommunit tigussagaat. Aaqqissugaanerup iluarsartuuteqqinnerata kinguneranik suliassanik kommuninut tunniussuinerumt Naalakkersuisut pingaarnersiunerannut atatillugu aningaasaliissutit nuunneqarput. Kommunini illussanut ikkussoriaannarnut, illunut sunut tamanut atorneqarsinnaasunut imaluunniit illulianut sanaqataaffiusunut kommunit aningaasaliissutit atussavaat. Aningaasaliissutit kommunit akornanni agguarneqarput, aningaasaliissutit 50 procentii ¼-inngorlugit kommuninut tamanut agguanneqarnerisigut. 50 procentit sinneruttut kommunit akornanni agguanneqarput, kommunini ataasiakkaani najugaqarfinni 700-t ataallugit inoqartuni agguaanermi naatsorsuinikkut.

Tamanna tunngavigalugu susassaqartut isumaqatigiipput, ataatsimoorummik tapiissutit 2017-imi 25,3 mio. kr.-inik kiisalu 2018-imit 26,5 mio. kr.-inik qaffanneqassasut."

Tassalu matuma siuliani allassimasutut illunut sanaqataaffiusunut tapiissutit maanna ukiuni arlalinngortuni kommunit kisimik akisussaaffigisimavaat. Allassimasutut aningaasaliissutit 2017-imiit atuutilersumik taamaallaat illunut sanaqataaffiusunut tunngasuunngillat, kisiannili aamma kommunini illuliassanut katiteriaannarnut, illunut tamatigoortunik atuuffilinnut (taakkununnga illut sulliviit ilanngullugit) tunngasuullutik.

Ukiumi pineqartumi kommunini ataasiakkaani illunut sanaqataaffiusunut aningaasartuutininut pissutsit arlallit apeqqutaasussaapput. Tassani taakku pillugit qinnuteqaatit, tamatumalu kingorna suliassamik sularinninneq apeqqutaasussaapput. Kiisalu nunaqarfinni isorliunerusunilu pisariaqartitsisoqassappat, kommunit illunik tamatigoortunik atuuffilinnik sanaartornissamik salliutitsisinnaapput.

Tamatuma peqatigisaanik erseqqissaatigineqassaaq, ilaatigut kommunini ataasiakkaani, taamatullu illoqarfinni nunaqarfinnilu illunik piginnittuusarnerup aamma piginneqatigiilluni inissiaateqarnerup ineriartortinnissaa siunertaralugu immikkoortumut pilersaarummik ataatsimoorummik suliaqarnissaaq kommunit akisussaaffigimassuk.

Kommunit missingersuutiminni namminneerlutik naliliinertik tunngavigalugu kommunini sanaartornermut aningaasaliissutissat qanoq tullerijaarneqarnissaannut aalajangiisinnaapput. Tamatumani aaqqissuusseqqinnermi innuttaasut qanillugit suleriaasissaaq tunngavigineqarpoq. Sanaartornermut aningaasaliissutit assersuutigalugu illunut sanaqataaffiusunut, illunut tamatigoortunik atuuffilinnut, piginneqatigiilluni inissianut, 20/20/60 naapertorlugu inissialianut aamma kommunit inissiaataannut attartortittakkanut aalajangersimasumik agguarneqarnissaat piumasaqaataannilaq.

Siunissami ataatsimoorussamik tapiissutini siunertanut aalajangersimasunut atugassiisarsinnaaneq kommunit ataatsimoorussamik tapiissutit pillugit

isumaqatiginninniarnernut ilaatinneqarnissaa iluaqutaasinnaanersoq apeqqutaavoq, Naalakkersuisut aalajangersimasumik aalajangiiffigisinnaangisaat.

Taamatut atugassiisarneq iluaqutissartaqarpoq taamatullu akornutissartaqarluni, tamatumalu peqatigisaanik apeqqutinik tunngaviusunik pilersitsivoq. Taamaattumik pisuni ataasiakkaani qanorluunniit pisoqaraluarpat apeqqut taanna kommuninut isumaqatiginninniutigineqaqqaartariaqarpoq.

Suliassaqaarfimmi pineqartumi suliassat naammassinissaannut akisussaaffiit qitiusumik katersuutseqqinnissaat kissaatigineqassappat, isumaqatiginninniarniviit ingerlaneqarnissaa imaluunniit kommuninut ataatsimoorussamik tapiissutit pillugit isumaqatigiissutitip (taassumaluunniit ilaata) taamaatinneqarnissaa pisariaqartussaavoq.

2. Nunaqarfinni suli illu sulliveqalersimanngitsuni illut sulliviit sananeqarnissaannut Kommuninut tapiissutaasartut atorineqartarnissaat pillugu Naalakkersuisut Kommuninut piumasaqaateqarlutik saaffiginninniarpat?

Akissut: Akissuteqaammut ilassutissamik Aningaasaqarnermut Naalakkersuisoqarfik pissarsiniarfineqarpoq, tassanngaanniillu ilisimatitsissutigineqarpoq:

Illunik sullivinnik sanaartornissamut aserfallatsaaliuinissamullu aningaasaliissutit siusinnerusukkut oqaatigineqartutut ukiut arlallit matuma siornatigut kommuninut nuunneqarsimapput. Taamaattumik illunik sullivinnik (illunik tamatigoortunik atuuffilinnik) sumi sanasoqarnissaanik pisariaqartitsisoqarnersoq kommunit namminneerlutik ilisimassagaat Naalakkersuisunit naatsorsuutigineqarpoq, taamaattumillu taakkununnga kommunit eqqumaffigineqqullugit kaammattuuteqarnissaq eqqarsaatigineqarsimanngilaq.

Aningaasaqarnermut Naalakkersuisoqarfiup § 37 naapertorlugu apeqquteqaammut matumunnga akissuteqarnissaminut ilagitillugu, ilaatigut Nunaqarfinni Isorliunerusunilu Ineqarnermut Pilersaarummut aningaasaliissutit atorineqarneri, kiisalu taakku sanaqateqarluni illulianut, illunut sullivinnut/illunut tamatigoortunik atuuffilinnut aamma kommunit illuliassaannut katiteriaannarnut agguanneqarnissaat pillugit kommunit oqaloqatigalugit aallartippaat.

Kommunit maannamut akissutigisartagaasa takutippaat, kommunit sivikitsumik piffissaqartinneqarlutik sanaartugassanut aningaasaliissutit, 2017-imiilli ataatsimoorussamik tapiissutit aqqutigalugit nuunneqartartut atorineqarneri pillugit tamakkiisumik paasissutissiiviusumik nassuiaateqarsinnaanngitsut, tak. apeqqut 1-imut akissut.

Taamaattumik tamanna pillugu oqaloqatigiinneq suli ingerlavoq. Tassunga ilanngullugu 2020-mi juulip qiteqqunnerani 2021-mut ataatsimoorussamik tapiissutissanut isumaqatigiissusiornissaq pillugu kommunit aamma Aningaasaqarnermut Naalakkersuisoqarfiup ataatsimeeqatigiinneranni ajornartorsiutit oqallisigineqarput.

Ataatsimiinnermi suliassaqaarfinni, Namminersorlutik Oqartussanit nuunneqarsimasuni kommuninut sanaartornermut aningaasaliissutit ersarinnerulersinneqarnissaasa anguniarneqarnissaa pisariaqartinneqartoq isumaqatigiissutigineqarpoq.

Tamatuma peqatigisaanik kommuninit nassuerutigineqarpoq, ilaatigut sanaqateqarluni illulianut tapiissutinik qinnuteqartoqarsinnaanerata innuttaasunut "pilersaarutigineqarnerunissaa" pisariaqartinneqartoq.

Kiisalu suliassaqarfik Namminersorlutik Oqartussaniit nuunneqarsimammat, suliassaqarfinni taakkunani qitiusumiit kommunalbestyrelsit kommunini sanaartugassanut aningaasaqarnermullu pilersaarusanut aalajangiisnaatitaanerisa akuleruffigineqannginnissaat kommuninit pingaartinneqarpoq.

3. Nunaqarfinni isorliunerusunilu inuit namminneq illutaartarnissaat siuarsarniarlugu 20/20/60-imik aqqissuussinermut aammalu piginneqatigiilluni (andelsboliger) illuliortarnissanut 2018-imiit 2020 ilanngullugu aningaasalersuutissatut qanoq amerlatigisut kommuninut tapiissutitut tunniunneqarpat?

Akissut: Akissuteqaammut ilassutissamik Aningaasaqarnermut Naalackersuisoqarfik pissarsiniarfineqarpoq, tassanngaanniillu ilisimatitsissutigineqarpoq:

Aningaasat apeqquteqaammi taaneqartut, kontomut pingaarnermut 20.05.20. Kommunimut ataatsimoortumik tapiissutit-mut ilagitillugu kommuninut ukiumoortumik ataatsimoorussamik tapiissutit pillugit isumaqatigiissutinut ilaatinneqartarput. 2018-imi aamma 2019-imi ukiunut tamanut immikkut katillugit 35,0 mio. koruunit kommuninut aningaasaliissutigineqarput. 2020-mi aningaasat taamaaqataanik katillugit 35,2 mio. koruuniupput.

2020-mut Aningaasanut Inatsimmi kommunit ataatsimoorussamik aningaasaliissutinut ilagitillugu katillugit 72,1 mio. koruuninik, taamaallaat ineqarnermi siunertanut pingasuusunut, apeqqut 1-imut akissummi taaneqartunut atugassanik tunineqarput.

Taakku Aningaasanut Inatsisip ukiuni sisamani atuuffiini 289 mio. koruuninik amerlassuseqassapput.

4. Isorliunerusuni piginneqatigiilluni illuliortalernissamik periarfissiineq kommunini tamani atorluarneqarpa?

Akissut: Apeqqut 2-mut akissuteqaat innersuussutigineqarpoq.

5. Nunaqarfinni isorliunerusunilu qanga 95/5 atorlugu nammineq illuliortarneq Naalackersuisut eqquteqqissallugu eqqarsaatigaat?

Akissut: Nammineerluni illuliortarnermut aqqissuussinerup, 95/5-imik aqqissuussineq malillugu aningaasalersorneqartartup atuutsinneqaleqqinnissaanik Naalackersuisut isumaliuteqanngillat.

Sanaqateqarluni illuliornermi taarsigassarsiat amerlassusissaat sanaqateqarluni illuliortarnermut taarsigassarsitisarneq pillugu Inatsisartut inatsisaat nr. 28. 3. december 2018-imeersoq aqqutigalugu allanngortinneqarput. Inatsimmi § 10-mi allassimavoq, taarsigassarsiat aningaasartuutit uppernarsarneqarsinnaasut tamarmiusut 95 %-ii tikillugit amerlassuseqarsinnaasut.

Taanna siusinnerusukkat atuuttumut, aningaasartuutinik tamanik ilanngussiviineq ajortumut, taamaattumillu nammineerluni akiligassat amerlaneruffiitut naleqqiulluni iluanaarnarneruvoq.

Nammineerluni akiligassat inoqutigiit isertitaat tunngavigalugit naatsorsorneqartarput, tassungalu tunngavilersuutigineqarpoq, inoqutigiit isertitakinnerusut inoqutigiinnit isertitaqarnerusunit pitsaanerusumik inississinnaanerat.

6. Illuortarnermut Kommunit tapiissutaasartut tamakkiisumik atorneqartarnissaat qulakkeerniarlugu Naalakkersuisut qanoq iliuuseqarniarpat?

Akissut: Apeqqutit 1-imut aamma 2-mut akissuteqaatit innersuussutigineqarput.

Neriuppunga qulaani allaqqasuni apeqquteqaatit akineqartut.

Inussiarnersumik inuulluaqqusillunga


Karl Frederik Danielsen